



ATASSUT

UPA14/55-1

Gerhardt Petersen

07.05.2014

Inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersumi kapitali 4-ip allangortinneqarnissaanik Naalakkersuisut sulissuteqaqqullugit peqquneqarnissaannik Inatsisartut aalajangiiffisassaattut siunnersuut, taamaaliornikkut illuutit ataasiakkaat niuernermi naleqassusaannut naleqqussaasoqarnissaa qulakkeerneqarsinnaaqqullugu.
(Inatsisartunut ilaasortat Knud Kristiansen og Gerhardt Petersen, Atassut)

Innuttaasut BSU aqputigalugu illuuteqartut assigiinngitsorujussuarnik atugassaqartitaasinnaasarput apeqqutaalluni nunatsinni sumi illuuteqarnerisut.

Tamatuma malitsigisaanik innuttaasut ilaat akiitsorpassuaqalersimasinnaasarput illu qanoq nalilerneqassanersoq pillugu malittarisassat ullumikkut atuuttut najoqqutaralugit, pingaartumik nunaqarfinni avinngarusimasunilu illuutillit.

Illuutini tamakkuninnga nalilersueriaaseq ineqarnerup iluarsartuuteqqinneqarnissaani ilanngullugit nalilersoqqissaarneqartariaqartut aammalu inatsisitigut naapertuussaaneq ingerlanneqartariaqartoq ATASSUT-mit isumaqarpugut, taamaammat siunnersuut manna saqqummiupparput.

Siunnersuut manna akuersaartumik suliarineqassappat qulakkeerneqassaaq illuutit niuernermi naleqassusaat tunngavigineqalissasoq, teknikkikkut aningaasaqarnikkullu nalingat kisimi aallaavigineqarunnaarluni.

ATASSUT-mit naalakkersuisut paasilluarsinnaavagut illuuteqarnermut tunngatillugu nalilersugassat assigiinngitsut ineqarneq pillugu aqqissuusseqqinnermi misissoqqissaarneqartariaqartut, nuannaarutigarpullu siunnersuutip matuma ilanngullugu nalilersorneqarnissaa ammaffigineqarmat.



ATASSUT INATSIARTUNI

Sumiiffiit ilaanni illut teknikkikkut aningaasaqarnikkullu naleqanngingajalluinnarsinnaasarput, taamaattorli isikkivia pissutaalluni illut immi naleerussimagaluartut akisuunngorlugit tunineqarsinnaasarput, sumiiffiillu ilaanni illut teknikkikkut aningaasaqarnikkullu pitsaagaluartut pisisussaartarlutik.

ATASSUT-mit isumaqarpugut pissusitoqqanut paarnaaqqaannartoqarani illuutillit pisortallu taarsigassarsisisimasutut tamarmik naammagisinnaasaannik aaqqissuussisoqartariaqarpoq, naapertuutinnngitsumik akiitsorpassuanissimasut iluarsivigineqarnissaat pissusissamisuusaaq.

Taamaammat ATASSUT-mit neriuppugut ineqarneq pillugu iluarsartuusseqqinnermi siunnersuuterput manna angusaqarfiusumik ilanngunneqassasoq.

Taamatut oqaaseqarluta ATASSUT-mit inassutigissavarput siunnersuut akuersaartumik suliarineqassasoq aappassaaneernejartinnagulu Inatsisartut Sanaartornermut Ataatsimiititaliaanut suliassanngortinneqassasoq.